

地 750.31  
33.92  
部二

鷺  
江名  
詩鈔  
勝



158

1.150

書	
號	96357
	函 1 冊
登錄號	

菲莊叢書第六種

鷺江名勝詩鈔

施乾題端



戊子孟秋  
刊於嶺南

鷺江名勝詩鈔序

鷺江爲漳泉形勝之區林翳蒼莽川原盤池軸轡雲  
集天海風迴逸客騷人於焉蔚萃或狀溪巖幽茂或  
誌仙佛靈蹤或暢風月清懷或抒英豪偉抱大都借  
境寫心悲歌弔古洵足傷已丙寅秋末江子仲春慨  
世運日陵盛衰有會仰瞻遐瞻颺起塵合爰搜芳韞  
續以留勝概待翫來許並附自著詩十餘章率皆遣  
興尋幽之作乃邦有湫阨雲狗離奇來日大難更不  
知若何景象也余足趾未蹈徒殷神想他年或可鼓  
棹漫遊必能得其要妙焉引領天南曷其有極鹽瀆

鞠逸氏金式陶叙於笑俗樓

江山舊夢盡入奚囊風月閑愁都歸詩債雅人韻事  
雲煙供筆墨之驅騷客幽情泉石寄胸襟之趣固不  
特滄溟放眼俯仰興懷花木關心徘徊感慨每值佳  
辰令節羌獨往而獨來抑逢蘭若梵宮只自吟而自  
止藉以抒盈腔之悵觸銷滿腹之牢騷已也夫秋月  
春風等閒誰得山邊水曲寄傲偏曾偶將身世餘愁  
惆悵效唾壺之破聊把家山賸恨猖狂同佩劍之敲  
似王之渙畫壁旗亭何處來拂塵紅袖若謝元暉驚  
人落雁幾回得拭淚青衫是亦有萬不獲已之孤懷

無可奈何之墜緒者矣乃若歌酣一曲扣艇吹殘酒  
煖千杯提壺泛去珠簾捲雨江天快一覽之奇觀鐵  
甕澄秋水月開雙清之勝境與鶴終宵而語鷗淑停  
車伴僧半日之閒螺峯展步其能無深歡逝跡陳之  
感切情遷事過之悲也哉然則見說前塵空談昔有  
名區千古孰知來者之蹤勝地一弓疇念曩時之客  
望空山之老樹結懷想於伊人對落木之西風傷睽  
違於曠代使不洞簫有賦焉傳佳句於王褒卽令黃  
鶴無題漫說窮才於李白則春水泛謝公之埭簪纓  
之雅集誰攀秋風尋季子之祠裙屐之幽懷曷繼鳴

呼此弔古者所以詩鈔冷壁傷心人因而筆橐荒邱  
豈無端哉深有慨耳若江子晴菴者卽其人也爾乃  
身輕竹杖步健芒鞋倚棹尋詩訪煙霞而笑傲看山  
覓句取風月以平章愛多景之清佳渾忘歲月懷良  
辰以臨眺不閒春秋故能長吉囊中滿貯名人綺麗  
歐陽筆下遍鈔墨客珠璣四壁玲瓏取之不厭千秋  
雅韻挹去如新呼將明月清風前歡宛在拾得陽春  
白雪古調同聽采薇搜先輩之詩惟一拳之不泐刻  
棗付手民之拓雖萬鎰其何加僕也風雅莫聞看花  
眼冷之無畧識作嫁心煩嘆山水之無緣誠聰明之

太誤白居易劍池香徑小住未能杜樊川禪榻鬢絲  
生愁轉甚問此軟紅十丈何當附驥之閒身對茲冰  
雪一編敢外塗鴉之小序丁卯仲春惠安賀仲禹序  
於繡鐵盒

江子仲春余曾題其祖母夫人行述復馳書屬題其  
所輯鷺江名勝詩鈔因知仲春天性真摯而又風雅  
宜人者鷺江距江南遠在三千里外僕衰老不復能  
躡屐遊訪心竊憾之讀仲春自序並其所作萬壽巖  
金雞亭醉仙巖虎溪巖白鹿洞諸詩不啻親歷其勝  
焉甚矣仲春之厚我也他日其所鈔集之鷺江名勝

歷代名人之作付之棗梨而公諸同好焉則仲春之  
厚我者並不一而足矣仲春真摯人度不以余言爲  
河漢也丁卯立秋日江南遜叟書

鷺江四面瀕海俗稱古桃源自李唐來文人流寓間  
有隱君子者出焉南陳北薛開文化之曙光迄今千  
餘年流風未泯騷人墨客訪塲老之故居弔草鷄之  
遺址父老猶能指而道之吾友江子仲春性好山水  
工吟詠每逢春秋佳日携斗酒雙柑登高望遠一邱  
一壑恆低徊不忍去間有殘碑斷碣名人題詠必錄  
而存之久遂裒然成帙余與君訂交伊始見其人恂

恂然類有道者流毫無末俗浮靡之習蓋深信其浸  
淫風雅而能自葆其真者心焉儀之今冬君出示鷺  
江名勝詩鈔并自作詩十餘首彙成一冊將以質諸  
世余讀其詩益信君之能自葆其真而證余言之不  
謬夫時至今日斯文將墜躁進者馳逐於利慾之場  
浮夸者復醉心歐化一二咕嗶輩又每蹈文人結習  
爲有識者所詬病君丁此潮流手把一編俯仰今古  
慨然有遺世獨立之意蓋其志趣已高人一等矣以  
君年少而志趣已若是異時深造之功吾惡乎測之  
哉斯編題詠類皆一時名人寄興而作可歌可泣都

四

菽莊叢書

付詩人無古無今須歸作者試觀古來名山勝蹟不  
旋踵而夷於荒煙蔓草間者何可勝道此編一出則  
地以人傳人以詩傳吾廈名勝亦與之俱傳後之視  
今猶今視昔他日三都萬紙不脛而走其光燄之不  
可掩者世且爭先觀之以爲快也戊辰冬至五日選  
閑王人驥序

將欲窮山川之勝槩搜宇宙之奇文則必探崑崙而  
採黃竹之歌登峒嶺而尋禹碑之記涉涇渭而觀石  
鼓之文其次則求李篆於瑯琊訪班頌於燕然摩挲  
石刻往復低徊此誠極斯文之大觀矣然而世人蓋

多病未能焉夫好高鶩遠常情所同吾人於兒時遊釣之鄉雖一壑一邱足蹟未能徧及而尙侈談高舉欲極遠以探幽非愚則妄耳邇者江君仲春以所輯鷺江名勝詩鈔示余屬余爲序余旣羨其遊踪之徧及鷺島而又喜其操觚握槩之勤也寧悵一言爲附驥乎語云行遠自邇登高自卑江君其有取於是耶他日寰宇訪碑輜軒錄古又當以此爲發軔也戊辰冬至後十日屏山徐樹藩序

余生草野每好登山臨水流連泉石故吾鄉之文圃龍門蘇嶺洪坑諸名勝無不足跡殆遍憶十年來浪跡鷺江抱牘權署公餘偶暇輒携斗酒雙柑作名山遊無何遂窮大小八景矣顧余性酷嗜石刻見丹崖蒼壁間前人手澤不盡摩挲之感爰鈔而存之案積盈尺復搜集古今名著及已所作者統計凡三百篇因念向者荔崖黃日紀先生有嘉禾名勝記之作傳誦一時然則嘉禾名勝旣有記矣安得無詩以張之耶乃編輯成帙彼此相輔而行鷺江名勝其不朽乎若謂傳得其人則吾豈敢嘗歲在丙寅孟秋之月海澄江煦識於鼓浪嶼寓廬

題詞

廖桂賢

天地有大文山川靈秀是山川不能言文章表其異  
古名山大川皆以文人貴名地得名流歌詠成軼事  
勝蹟遍方輿臚舉難悉備或以招奇觀或以藏幽致  
造物廣雕鑄鬼斧神工肆仁智樂雖殊游賞同快意  
下及各都邑得名傳奕禩賦傳赤壁遊樓傳岳陽記  
高閣序滕王雅集蘭亭至詩紀琵琶行書墓廬山誌  
五嶽五湖外其餘可推類古閩有鷺江風景妙無雙  
地擅福州勝潮湧廈門撞更喜鼓浪嶼嵐氣雜飛淙  
鹿溪與鼇江齊名噪海邦勝遊招吟友月夜泛輕艤

六

菽莊叢書

鷗夢沙汀狎龍文椽筆扛一觴更一詠銅琶鐵板腔  
高唱大江去豪氣髯蘇降江山助文字文字饒風趣  
咳唾盡玉珠魚龍恣遊戲彩筆擅江郎一一爲編次  
既自舒雅懷更以表同志湖海豁胸襟浮生悵萍寄  
不朽惟立名翰墨流傳易人傑本地靈地靈賴人瑞  
地因人有名人亦因地識浩浩此江流遊者幾蒼萃  
弔古更傷今碑墜羊公淚賴有此篇存庶幾名不墜  
盛會恨難逢匡廬遠翹企拋磚引玉來浣誦長心醉

李禧

無數煙雲一卷詩三年鐵網長珊枝剔苔字遠摹元

宋剩草碑難擁阮池

謂阮文錫池顯方

花筆風流應比鳳江城

人物幾跨龜

薛起鳳著鷺江志池直夫玉獅山房詩城中英雄曾幾代未有一人跨龜背

遺珠我亦求

滄海惆悵詞壇歷劫時

近從友人鈔得榕林題詠

盧陳巍

綵筆傳來藻思抽扶筇覽勝任勾留騷壇雅詠零縑

拾鷺島風光尺幅收蓮幕香生閒選韻柳隄春暖喜

尋幽卽今海滌稱佳境弁冕閩江上下游

江郎才藻自風流水色山光筆下收蕭寺籠紗尋妙

句芸窗綴錦萃同儔樓誇五鳳經年造賦擬三都到

處售回首延平蹠踞地鴻編大業竝千秋

七

菽莊叢書

林爾嘉

會稽南部烏衣國海濶天空寫照難柳店賣詩仙眷

屬榕林紀勝古江山泥中印爪驚鴻去雲外銜箋待

燕還五色吟毫新定稿長留韻事在人間

柯徵庸

一枝綵筆手能持名勝留題別薛碑案牘勞勞蒐輯

遍霽秋詞譜仲春詩

近林霽秋先生亦供職權署著有泉南詞譜

曾共留雲洞裏探偏收俚句入詩龕荔崖紀勝梧山

志韻事借君鼎足三

客秋九日林君剛義邀菽莊吟社諸友登洪濟山君與余均與焉

南嶽傲樵

會稽南部江山好何處無鴻爪烏衣故國劫餘灰燕  
子銜箋飛去復飛來詞人好事搜奇句古錦囊中  
貯孤吟百尺最高樓金帶水邊驚起幾閒鷗

右調虞美人

例言

一是編始自宋賢終於近人未附已作其編次以名勝爲主而後以作者之年代遠近爲次亦有無從考得難免倒置又有見聞未及不無疎漏是亦滄海遺珠之憾唯閱者諒之

一是編以石刻及刊集鈔錄而成其石刻遺著年久代湮間有殘缺或苔侵剝蝕字跡不明者均空白之若原文有誤亦未敢擅改付諸闕疑以待通人正之

是編搜集時頗得林霽秋李繡伊林凌霜黃松鶴諸

一  
菽莊叢書

公之助並誌於此以示不忘

編者識



鷺江全景

鷺江名勝詩鈔

海澄江 煦編

鷺江

同安縣志廈門一名鷺江

讀史方輿紀要廈門作夏門一名鷺嶼

薛起鳳撰鷺江志

煦謹按據廈門父老傳言廈門未開關時有白鷺甚多棲止江上故有鷺江之名廈門志云廈

門亦號為桃源明紀石青題詩云花源今可得此亦一桃源又有句云玄鬢青衫漢代口桃花流水豈秦人

廈門自宋時

名為嘉禾嶼屬泉州府同安縣以產嘉禾得名

志宋太平興國時產嘉禾一莖數穗故名明江夏侯周德興城廈門

是廈門二字之始見為

中左所

洪武元年定自京師至郡縣皆立衛指揮使領左右中前後五千戶所隸福建都指揮司二十年江夏侯周德興經略福建抽

鷺江名勝詩鈔

一 戒莊叢書

三丁之二為沿海戍兵防 置衛所當要害處城水鴻為永寧衛領左右中前後五千戶所又復設守禦千戶所城廈門移永寧中左二所兵戍守為中左

所設守禦千戶所 隸福建都指揮使鄭成功據廈門時名為思明縣清康

熙十九年提督萬正色克之復名廈門廈門島屹

立海中周五十餘里

山川志廈門廣袤不及七十里

環島為嘉禾海

江 北望同安西界海澄東阨烈嶼南臨大海汪洋

浩瀚障以太武外與金門為犄角二登防於內

大登

小登一擔捍於外

大擔小擔

浯嶼則孤懸海表控制要衝於

是東南海口布置局鑰固若金湯港汊孔多帆檣

集湊誠遠近貿易之都會也民國紀元前四百六

十一年葡萄牙人來廈求通商則我國與西人第

二通商港也清道光二十年南京條約開放廈門

為通商五口之一民國光復置廈門道

轉莆田仙遊思明晉江南安惠

安安溪同安永春德化大田金門等十二縣 治思明縣道 年以後廈門開

關馬路修治市場城垣夷毀高樓矗立經營公園

填築海岸商旅絡繹人煙稠密其繁盛殊非疇昔

可比鷺江舊稱八景洪濟浮月。陽臺夕照。萬壽松聲。虎溪夜月。賞營漁火。鴻山織雨。五老凌霄。鼓浪洞天後人補八景。南

普蓮香。海蜃晚照。白鹿脚煙。雙潭獨月。龍湫塗橋。萬笏朝天。水天一色。金雞曉唱。

登城 明 何喬遠

溟渤周遭繞戍城蒼蒼寒月海頭生北風正捲南夷

舸山壘全屯水戰兵吹浪魚龍遙滅沒爭枝鳥鵲近

鷺江名勝詩鈔

二 張莊叢書

分明周侯澤普當年役此夕登臨萬古情

視師中左 南居益

寥廓閩天際縱橫島嶼微長風吹浪立片雨挾潮飛

半夜防維櫂中流護袂衣聽雞頻起舞萬里待揚威

一區精衛土孤戍海南邊潮湧三軍氣雲蒸萬竈煙

有山堪砥柱無地足屯田貔虎聊防汛蛟龍隱藉眠

鷺門觀海 清 張對墀

康回憑怒折地維精衛木石無所施茫茫大地滙為

水至今東南名天池天池何浩浩近接鷺門島帆影

蔽津梁桅尖拂蒼昊龍戶耳目奇馬人鬚眉老鑿齒

雕題重譯聲南金大貝諸夷寶家塗翠碧與丹青人  
飾珊瑚及瑪瑙試問此物所從來盡說梯航由海道  
海色溘然朝宗百川白迴島嶼蒼繞市廛山頭返照  
港口橫煙洶洶涌淼淼困困九年水不潦七年旱  
不乾昔聞黃河之水天上來今見滄海之水天外交  
更上山頭第一峰海外奇觀收目睫排天風浪雪山  
傾浴日鯨波金冶洩十尋樓櫓拄高篷看似空中舞  
片葉須臾萬里乘長風依稀篷影亦澌滅縱有錢鏐  
之弩能射潮伍胥之海能鼓浪一旦對此亦應心魂  
怯吁嗟乎海之源無底止海之濶無涯涘洞庭雲夢  
真可吞江淮河漢浮漚耳我欲臨流乘風訪八遐衝  
風破浪不用指南車直向吾家博望借仙槎扶桑暘  
谷皆游徧身騎燭龍排雲霞迴首泥塗煦沫者紛紛  
轍紂與井蛙

廈門大風望海卽事

趙翼

海聲連日吼颶母發狂颺信有水皆立兼疑山亦搖  
樓船依古嶼烽火隔秋潮安得鞭驅石排成萬里橋

颶風歌

趙翼

昔聞海風颶最大我今遇之鷺門廨誰將噫氣閉土  
囊一噴咽喉不可搯齶齶萬鼓排陣來群木盡作低

頭拜鬱怒似有塊磊填憤盈直覺虛空隘鬼魔掀動  
天擺摩虎豹吼裂山破壞立脚雖穩尙愁倒對面相  
呼只如贖可憐鸛鵲亦不飛恐被狙出青天外是時  
習流千戰權眼望赤坎不得到湧浪上薄浮空雲濺  
沫橫轟發機礮盡排鷁首椽棧牢猶自終宵驚簸棹  
風名颶母應雌風胡爲更比雄風雄想從小女封姨  
後老作陰怪多神通多神通何不吹轉颿向東不然  
竟刮海水竭平步可達扶桑紅吾當綠章上箋奏俾  
爾配食天妃宮

鷺門紀槩

洪和長

鷺江名勝詩鈔

四

菽莊叢書

錦繡煙花自一洲無邊風景似杭州樓臺半蘸晴長  
水簫鼓時聞畫鷁舟芳草遺釵春拾翠紅綃顧曲夜  
纏頭我來不作繁華夢爲有青山約未酬

廈門觀海

張際亮

一氣遙連四大州誰能鐵索截中流只如唐宋愁戎

馬

前代邊患多在西北至明中葉東南夷患始烈天地自然氣數也

不數燕齊鬥火牛

逆夷火器甚利廈門遂無

可扼之隘

勇憶乘桴難泛宅醉思請劍尙登樓天風海日

蒼茫裏試問扶桑幾度秋

兩島能支半壁天草雞長耳憶當年伍胥潮汐仍終  
古楊僕樓船自黯然雲出鯤身橫海外水浮鰲極動

樽前登臨儘有興亡感鯨飲須同吸百川

廈門

孫爾準

廈門本荒碕何年盛都會海壖數繁要彈丸乃稱最  
自從鯨頭人於此建大旆金門依輔車浯嶼互襟帶  
台陽跨天險澎島通地肺倔強波濤間自覺夜郎大  
七星兆妖讖兩豎效狼狽終日尋戈矛先後伏堪欽  
大帥設中權四鎮屯下瀨碧海澄波瀾黃圖大無外  
浮天走估舶隘地集市僧南琛獻丹于上貨羅紫貝  
權估設關梁譏苛竿舟軌姦富操奇贏末游藉沾丐  
邇來頗凋劫褊陋等自鄙盛衰有倚伏物理戒其大  
龜毛詎成氈蟬腹將欲脫寄語桑大夫心計曷足賴  
廉如蕭廣州方物倍司會